

**ROBERTICO ROSENDO CROES,
mehor conosi como Tico,
nasi 28 november 1955
na Aruba. Tico tin VWO-opleiding
te na examen. Aplica pa beca**

Mi a aplica pa un beca na Land door di Sr. Hendrik Croes. Nan a ponemi warda masha hopi mes i esaki a causa mi bastante problema na mi cas, pasobra nan no tabata confia e asunto mucho. Cos tabata hole un poco putri. Pero mi sa ora mi tuma un desision ta ki decision mi ta tuma.

YEGADA NA COLOMBIA FATAL

Al fin ora mi a keda kla cu mi a bin aki, mi a haya otro decepcion. Nos a haya problema na Barranquilla cu nos mester a keda un anochi aya. Despues otro problema na Bogotá. Chauffeur di taxi ta baha nos maleta meimei di caya. Sin sa unda bai, den yobida.

Tambe nos a haya masha poco cooperashon di Sr. de Jong, kende tabata e contactman akinan.

Ora ela papia cu nos ela expresa su mes den un tipo "Yo se todo y Uds. tienen que escuchar". Ningun rato ela actua como Antiyano. Ningun ora ela purba contact nos na ningun manera, semper ta nos tabata yama Sr. de Jong i nunca e no tei.

Ora cu nos tabatin dos dia sera den hotel sin ningun contacto cu ningun Antiyano nos a bai embahada. Prome nan a duna nos adres fout tambe.

Sr. de Jong no a gusta, nos mester a hasie afspraak cune, pero nos a bise cu tabata e unico manera cu nos por a bini den contact cune. Al fin al cabo nos mes a yuda nos mes. Ningun hende a yuda nos. Esaki sigur sigur tabata un bon experiencia, pero na principio e no ta un estimulo pa bo estudio. Semper e prome impreshon di un pais ta traha hopi ariba bo, pero si nos tabata hende debil nos lo a bai bek Aruba cu e prome avion.

NA UNIVERSIDAD

E estudio ta hopi interesante, pero e contactnan na Universidad ta desastroso. E muchanan ta laaf i nan ta bai Universidad solamente pa muestra nan bunitesa. Of nan ta bai sinta. Mayoria ta hende di edad cu ta traha caba. Kizas door cu nan ta traha henter dia nan no ta contact hende hopi. E contactnan ta masha superficial.

Nan no ta na haltura di nada i nan ta masha sera. Nan tin miedo di expresa nan mes. Ora nan lesa corant nan no ta capta un idea, nan no ta analisa loke nan ta lesa. E lesnan ta wordo duna serio si i e Universidad Nacional ta habri pa tur hende. Lastima cu e cuponan ta masha limita. Bo ta lesa i tende cu 10.000 estudi-

ante ta aplica pa promer simester, pero solamente 1.000 ta wordo accepta. Unda e otronan ta bai? No tin trabao. Kiko nan ta hasie?

DIFERENCIA ARUBA | COLOMBIA

E diferencia aki ta mescos cu nochi cu di dia. Prome e sistema di bida ta hopi diferente. Aki eigenlijk e hendenan cu tin como nan hobby politica ta mira loke nan ta lesa.

Tur teoria cu ami, cu tin politica como hobby tin, nan tine den praktika. Aki bo ta mira kiko ta represhon, kiko ta violencia, kiko ta acusamento di poder, pobresa, demagogia di corantnan.

Mentalidad ta un punto aparte. Nan tin asina hopi prehuicio. Hasta nan ta percura pa camna bon pa otro hende no bisa cu nan no ta camna bon. Mi kier sa cu hasta tin biaha nan tin miedo di hala rosea, pa otro no pensa di con nan ta hala rosea. Esaki ta algo grandi i increible.

FATALISMO

Bo ta keda asombra con consiente e hendenan ta di politica. E concientizacion ei ta masha strango. E ta wordo condiciona completamente pa e fatalismo cu nan tin.

Por ehempel bo ta haya strango con un taxista ta completamente al tanto di e situacion politico, pero e ta bisabo: "Que podemos hacer!"


Comprende cu e fatalismo grandi aki ta stroba completamente e desaroyo di e pais.

Nan no ta pensa kiko ami por hasie pa mi pais, pero kiko Colombia por hasie pami. Kizas e fatalismo ta wordo splika naturalmente i e prehuicionan tambe por wordo splika sientificamente, pero e educacion, e gobierno, ta percura pa medio di educacion mas importante pa kibra esaki.

Mi ta kere, mi tin e impresion, cu gobierno ta coopera cune, pasobra e ta bai contra interesnan di cierto hendenan.

CON BO TA COMPARA INTELIGENCIA DI ARUBA CU ESUN DI COLOMBIA?

Inteligencia ta dificil pa bo duna un



TICO CROES

opinion ariba dje, pa motibo cu mi ta kere di prome si nos cohe relativamente mi por bisa cu e muchanan di secundaria cu mi a haya chens di contact cu nan ta hopi consiente ariba e tereno politico.

En cambio na Aruba, por ehempel, ami cu a bai Colegio Arubano, hopi mucha ta studia pa studia sin ta interesa, despues naturalmente e interes ta bin. Esei no ta implica cu aki nan ta mas inteligente cu Aruba, esei ta difisil pa bo bisa. Bo no por bisa cual pais ta mas inteligente cu otro. Cuestion di inteligencia ta masha relativo. Ta cuestion di e medionan cu bo tin cu bo pa por hasi esei, desaroya e inteligencia. Tur hende ta nace cu un cierto grado di inteligencia, pero ta depende con bo por desaroye.

Nos tin mas medio, compara cu Colombia, pero esei no kier meen cu un Colombiano no por ta inteligente.

AWOR CU BO TA BIBANDO NA COLOMBIA KIKO BO TA PENSA DI NOS MENTALIDAD, NOS TA PERTENESE MAS NA UN MEN- TALIDAD EUROPEO CU LATINO AMERICANO?

Den prome caso nos ta mas europeo cu latino americano. Mi no ta waak ningun grado na e momento aki, mi ta papiando di mi generashon, di e punto di identificacion, pasobra e machismo cu tabatin antes ta bayendo. Hasta mi por tribi bisa cu e no tabata existi den nos generashon, of masha poco mes si e ta existi. Pero aki nan si, homber

mester muestra machismo, i si bo trata e muhernan cu igualdad, nan no ta gustabo.

E muher mes ta contribui na e homber, e machismo. Bo mester dal nan un bofta, laga nan sinti cu abo ta e homber pa nan gustabo, den moda di papia. Tin biaha den bus ta pasa cosnan straño, ora un mucha muher subi, casi nan ta dal nan cabez den dak, pa lanta para i laga e mucha muher sinta.

TEMPO LIBER

Den mi tempo liber mi ta lesa hopi ultimamente. De bez en cuando mi ta sali, mainta especialmente. Mi ta bai centro, pasobra mi ta gusta observa cosnan.

E CONTACTO CU OTRO ESTUDIANTE ARUBIANO

Nos unico contacto ta cu fiesta i e cuestion deportivo. Mi por bisa cu e contacto ta den su principio. Mi kier pa e bira mas hanchu si, aunke mi ta waak e pida ei un poco scur debi cu aki nos por forma un grupo antillano, pero e cuestionan cultural lo ta masha limita, pasobra nos ta muchu poco hende. Nos mester laga nos idioma un banda pa adapta nos na e idioma spanjo, pa otro hende tambe bin participa den. I por lo tanto por ehempel mi conose un of dos hende mas cu ta skirbi poema mescos cu mi, pero varios biaha mi a purba contact nan pa nos intercambia idea di poesia, pero no tabatin muchu entusiasmo.

MENTALIDAD

E hendenan aki tin un manera masha straño di pensa. Nan no ta laga tema habri pa amistad. Nan no ta duna bo chens pa desaroya bo mes como persona. Nan ta kere cu asina bo sali cu nan, bo tin compromiso.

E PLACA DI BECA

Mi no ta di acuerdo cu e placa di e beca cu mi ta hayando, pasobra pa un estudiante e ta poco. E no ta yega pa bo biba saludable aki. Boekinanan ta hopi caro, e Universidad ta caro, i ademá un estudiante su bida no ta boeki i Universidad so.

Bo mester tin e libertad i e facilidad

di por bai waak un pelicula, pa bo analisa, bai waak un teatro, tur esei ta costa placa. Actualmente na Colombia tin diferente festivalnan di pelicula, manera Chino, Cubano.

Di e banda ei Bogotá ta hopi bon. Especialmente pa un hende cu ta studia politica, ta un cuestion masha sano pa waak e diferente culturanan cu pa bo ta importante, pasobra al fin i al cabo abo ta esun cu en lo futuro lo bai tene contacto cu otro paisnan i por lo tanto bo mester sinja conoce nan cultura, nan manera, pa bo por adapta bo mes mas lihe.

OPINION DI E ACTUAL WELGA

Naturalmente, como politico mi ta na altura di e welga. Mi ta di acuerdo cu e welga di e estudiantenan. Mi ta haya un lastima cu na e momento aki mi no ta Colombiano, debi cu como stranhero mi no por bisa ni A ni B. Mi ta manera un morto bibo na Bogotá.

Pero sigur cu si cu e estudiantenan tin tur nan razon i hopi di nos ta hasi e fout di waak solamente di nos banda personal so cu ta stroba nos estudio, pasobra nos mester waak cu ta prome biaha na Colombia cu e estudiantenan ta purba di integra completamente den e bida Colombiano, di e campesino i obreronan. Nan ta purba di forma un bloke hunto.

Nan kier bira mas consiente di loke nan bida como estudiante ta. Kiko futuro lo ta. No manera prome, drenta Universidad pa haya un bon puesto i gana placa, sin tene cuenta, cu al fin i al cabo nan ta Colombiano i nan mester traha pa bienestar di nan pais. Na e momentonan aki tin un solidaridad mas grandi cu nunca den e pueblo Colombiano tocante esei.

PROBLEMA

Pa e motibo ei ta duel mi di no ta Colombiano i mi no por participa den nada. Pa agrega mi kier a pidi Gobierno un tiki mas atencion pa nos. Interesa un tiki mas pa bin waak nos problemanan. Nan ta hopi aki. Sigur cu si. Pa nan duna informacion na e siguiente estudiantenan cu lo bin. I di nos parti forma aki un grupo pa e futuro estudiantenan no

pasa den e mesun problema, den e mesun awa salu cu nos a pasa aden. Pa agrega algo mas encuanto e estudiantenan mi kier a bisa cu na e momentonan aki mi ta prefera di ta un Colombiano, pa e simpel motibo cu mi ta sintimi frustrá unda mi no por duna mi opinion completamente liber. Como Rubiano, un rubiano di curazon mi ta keda sinti esei semper, mi ta completamente afó di tur libertad di expresion, sino mi ta corre e peliger cu lo mi wordo saka for di Colombia, loke sigur sigur mi lo no permiti. Esei lo no contribui ningun rato so na e bienestar di mi pais, locual pami ta primordial. Simplemente mi tin un gratitud enorme na Colombia, pa e oportunidad cu ela brinda nos, di por a studia aki, en bes di duna su mesun hendenan so e oportunidad.

Tambe tur e otro estudiantenan a duna e parti negativo di Colombia, pero cu esaki lo sali na cla cu hopi hende lo dicidi di no bin Colombia mas. Esaki sigur lo ta fout.

Bogotá ta un ciudad ideal pa por studia, pasobra Bogotá ta un centro cultural i universitario na unda bo ta topa tur clase di nacionalidad. Por ehempel den mi curso mes nos ta como cuatro clase di nacionalidad, pero e situacion politico aki ta hasi cu un hende ta bira hopi mas consiente di loque ta un bida i loque no ta bida i si un hende, na Colombia en especial, no bira consiente, nunca mas lo mi duda cu un dia lo bira consiente. Pero mi no ta spera cu despues di e entrevista aki e muchanan cu ta interesa pa studia na Colombia cambia di idea, pasobra cu berdad, di tur e cosnan aki Colombia lo keda semper den e equilibrio positivo.

RED.: Un bes mas nos ta gradici Aerocondor pa su cooperacion. Tambe Revista Amistad a entrega e estudiantenan 10 flanel pa praktika deporte cu nomber di Revista Amistad Aruba riba dje. Tabata pa nos tambe un honor grandi di por a organisa dos diferente fiesta Arubiano pa e estudiantenan Arubano. Na tur e estudiantenan hopi exito.

f1. 1,25

AMISTAD

ANNO 5, NO. 8

ARUBA, MEI 1976

TEEN
PRINCESS
ARUBA
1976

BLANCA
DE MEY



foto:
CHECKPOINT
COLOR